

毘陵人品記

毘陵人品目三

宋

張觀

杜鑑

許九

張似

張盪之

張次元

葛宮

葛密

葛書思

陳恩道

孫達

時父

邵靈甫

沈樗

蔣堂

胡宿

胡宗炎

胡宗愈

杜杞

蔣昂

袁默

凌浩

丁寶臣

錢公輔

丁騭

蔣之勉

蔣之奇

蔣璿

人品記

目三

蔣燦

蔣興祖

蔣芾

虞大熙

單錫

字錫子
發孫時

張巨

陳敏

沈初

錢顥

許德之

王岡

余中

邵材

強翊

李堪

錢道人

許恕

劉谷

呂大策

錢卽

龐安仁

張舉

沈積中

周孚先

周恭先

鄒浩

鄒柄

唐棣

霍端友

霍洞

李謨

毘陵人品記卷三

宋

張觀字仲賓毘陵人南唐舉進士歸宋拜監察御史
三司言劍外賦輕詔觀徃按疏言遠民不宜輕動
撫之猶慮失所况增賦以擾之乎太宗然之復上
言方今遠人未服邊鄙不寧陰陽未序倉廩猶虛
淳朴未還奢風尚熾刑法未措禁令猶密封祀猶
闕誠願陛下體貌大臣使沃心造膝極意論思上
嘉納詔遷度支判官俄出爲諸路茶鹽制置使以

言忤旨改知黃州遷揚州皆有善政召爲三司河
東判官以越局言事出知道州移廣南西路轉運
使坐奏黎桓丁濬事被劾卒觀博覽史漢論事切
直有古人風

杜鎬字文周無錫人博學彊記太宗朝爲國子監丞
崇文院檢討時將南郊慧星見宰相問之鎬曰當
祭而日食猶廢况謫見如此乎上爲罷郊祀遷著
作佐郎歷秘閣校理太宗觀書秘閣鎬對經義稱
旨又論黃金貴賤及天寶黎園事敷奏詳明再遷

爲駕部員外郎判太常禮院編次館閣書籍會修
太祖實錄命鎬檢討故事以備訪問景德初授龍
圖閣待制加都官郎中從幸澶淵凱旋遇懿德皇
后忌日或以軍中鼓吹爲疑馳問鎬鎬曰武王載
木主伐紂前歌後舞可據也與修冊府元龜拜右
諫議大夫龍圖閣直學士特命班次樞密直學士
儒者榮之真宗每得古物異書以詢鎬皆能究其
本末凡所檢閱必戒書吏云某事在某書某卷幾
行覆按無一差謬士大夫有所論譔訪以古事雖

晚輩卑品應答無倦所居僻陋僅蔽風雨和易清
素上類推重官至禮部侍郎

許九無錫人力田爲業早喪父獨與母居歲饑九乞
食養母人厭其數數斥之九晝夜悲痛因斷手取
信血不出人以爲異復乞入市因取所斷手置杖
頭示信市人哀之咸餽食其後母子果全于難進
士孫浩聞於邑令令以九毀傷肢體爲不孝逐之
浩與俱去留養於家母卒九添其斷手口誦浮屠
言與母俱歿

張泌毘陵人隨李煜入朝太宗授之史館家多食客
一日太宗問曰卿何食客之多泌曰臣之親舊多
客都下貧乏絕糧臣累輕而俸有餘常過臣飯亦
不過菜羹已爾一日上遣人伺其食時突入取客
食以去果糲飯菜羹上始信其不欺時爲之菜羹
張弟鑄字希賢祥符中進士四典名郡五任憲司
皆有殊績子昱之

張昱之字景山亦舉進士歷知温州蔡齊薦其材擢
提點淮南路刑獄楊崇勲知亳州恃恩不法誣陷

蒙城令昱之廉出之徙廣南東路轉運使夷人有
犯其酋長窮治慘酷昱之請悉用漢法徙河北轉
運使備邊諸州發卒斬西山木卒逃入契丹者歲
數百計昱之戒斬木毋得深入卒不復逃還爲鹽
鐵副使擢天章閣侍制轉河北都轉運按察使內
侍楊懷敏任邊事殺保州通判石侍舉謀爲亂昱
之自魏馳至部分諸將召懷敏曰不卽來當治以
軍法懷敏旣至不解兵昱之曰將欲反邪叱去兵
衛懷敏不敢動還除戶部副使奪職知虢州後與

從父鑄並以光祿卿致仕縉紳榮之鼎之喜吏事
所至有聲退居築家廟率子弟奉祀焉

張次元鼎之子以父任累轉太常中書提舉淮南市
易事以稱職聞知信陽軍興學作士學者感孚除
江淮荆浙福建廣南提點坑冶鑄錢司事躬自巡
檢務革積弊卒於道山陽徐仲事聞之嘆曰張公
所性高明義而能果公不可撓清不可污考其所
尚蓋古之剛者也鄒忠公雅重其人旣沒序次其
行事傳之

葛官字公雅江陰人舉進士授中正軍掌書記善屬文上恭平雅頌十篇真宗稱善召試學士院出知南兗縣東川饑部使者檄守資昌兩州以惠政聞知南劍州諭降土豪聚黨阻山澤者山多銅銀吏挾姦罔利歲課不登官變法裕國歲羨餘六百萬三司使以聞論賞官曰天地所產吾顧盜之又何以爲功乎累官工部侍郎卒年八十一官性敦厚恤宗黨撫孤嫠衆以長者見推

葛密字子發官之弟性恬靜舉進士爲光州推官有

異政仕至太常博士年五十上章乞休姻黨交止
之笑曰侯罪疾老死不得已而休官者安有餘裕
哉卽退居青陽湖上號草堂逸老年八十四而卒
生平爲詩慕李商隱有西崑高致湖上集

葛書思字進叔密之子亦進士調建德主簿欲迎父
之官父難之書思曰曾子不肯一日去親側豈以
五斗米移素志哉遂投劾歸養十餘年近臣表其
志行起爲泗州教授弗就居父喪哀毀骨立盛暑
不釋苴麻終禫不忍去塚舍久之出爲封丘主簿

仕終朝奉郎父子清節後先相映崇寧間特詔賜謚清孝

陳思道江陰人鬻醯爲生買物不酬價人服其德母病衣不解帶者數月飲食隨母多寡母喪水漿不入口七日旣葬結廬墓側日夜悲慟晝則白鬼馴狎夜則虎豹環廬而臥咸平初詔賜束帛旌其門孫達晉陵人母周氏嘗刲股起父疾戒達勿從王金陵學母卒哀毀踰禮崇寧間郡守李孝節請表其閭裔孫鎬年老病疽其子裂肝以療尋愈淳祐間

郡守李迪表其所居里爲申孝以昭世德云

時父宜興人尚書時彥之父逸其名故稱時父初爲
鄭州牙校年六十餘無子入蜀部綱妻勸其市妾
獲一女甚端嚴扣其由來默不對且起見其以布
括髮怪問之女泣曰妾本京都人父雅州椽道卒
母鬻妾爲扶柩資父惻然亟以女還其母而不索
其金更出所餘助之歸葬還告其妻妻曰公陰德
厚矣何患無子一夕夢偉丈夫衣金紫坐中堂尋
有娠生子彥字邦美舉進士仕至吏部尚書

邵靈甫宜興人。倜儻好施。予家儲穀數千斛。咸平中大饑。或請乘時糶之。曰是急利也。或請損直糶之。曰是近名也。或曰將自豐乎。答曰有成畫矣。乃盡發所儲。僱傭除道。自縣至湖汶鎮四十里。浚蠡河橫塘等水道八十餘里。通菴畫溪入震澤。邑人爭受役。皆賴全活。而水陸又得俱利。子梁登進士第。孫剛魁南省。蓋積善之報云。

沈樗字斯年。無錫人。淳厚樂善。饒貲。好施。假貸多折券。歲歉。傾廩賑恤。嘗以金萬緡佐軍興。朝廷欲官

之不願賜號達義處士

蔣堂字希魯宜興人舉進士知臨川縣發謫豪僭明
道初召爲監察御史禁中災有司欲罪宮人堂言
火起無迹恐重天譴遂得詔原論郭后不當廢坐
黜嘗發運江淮歲薦士二百人或疑其濫曰十得
二三亦足以報國矣尋以事謫官越州奏復鑑湖
侵于豪右者擢天章閣待制江淮發運使先是發
運使以上計爲名賄遺權貴堂曰吾豈爲此歲人
可附驛奏也前後五年未嘗一至京師後以樞密

直學士知益州克振學舍選賢以教諸生儒風大振以禮部侍郎致仕卒堂清修純節遇事毅然不屈貧而樂施好學工文詞延譽晚進至老不倦尤嗜詩學有吳門集二十卷

胡宿字武平晉陵人登第爲揚子尉縣大水民被溺宿率公私船救之全活甚衆進集賢校理通判宣州有囚憚簿楚自誣伏宿疑之辟左右問之良久繙閱初詞蓋婦人與所私殺其夫而誣之以自釋也知湖州前守滕宗諒大興學校費錢數十萬宗

諒去僚吏疑其欺不肯書曆宿謂之曰滕侯有過
盍不早正俟其長而正之豈昔人分謗之意乎僚
吏大慙謝又築石界界上界井井水患民號曰胡公塘
人知制誥內都知楊懷敏坐衛士之變被斥未幾
復召宿封還詞頭命遂寢京東兩河地震宿通陰
陽五行災異之學疏言應在西北二邊明年王則
果以貝州叛時議謂士大夫七十當致仕不知止
者令有司案舉宿謂非優老之義武吏第察其任
事與否勿斷以年文吏當使自陳全其節及言新

樂舊樂難與竝用間歲貢士不若三年皆如其言
唐介貶嶺南帝遣中使監護宿言事不可測介如
道歿陛下有殺直臣名帝悟追還中使涇卒之變
詔劾治三司吏三司使包拯護弗遣宿曰計吏支
折不以時安得無罪更拒制命紀綱廢矣拯懼立
遣吏拜樞密副使曾公亮任趙滋興兵治界河事
宿言於英宗曰今者南北通好內外無患近邊遽
來上不過侵誣尺寸此城若之吏力能辨詰何至
興甲兵哉縉紳多耻燕京外屬顧天時人事未至

而妄意難成禍且隨之願守兩朝法度以惠元元
天下幸甚宿爲人清謹忠實內剛外和守道自信
不以進退爲意臨事重慎不輒發發亦不可回群
居不譁笑居母喪三年不入私室雖貴達常如布
衣時每語後進曰富貴貧賤莫不有命惟當修身
俟時母爲造物所嗤世以爲名言治平中數乞謝
事詔以太子少師致仕卒贈太子太傅謚文恭

胡宗炎字彥聖宿之子由將作監主簿登第累陞吏
部郎中哲宗崩遣使來吊祭宗炎以鴻臚少卿送

境上使者不易服宗炎以禮折之須其聽命乃相見既還升爲卿初父宿使遼遼人重之後知鴻臚卽其子也輒嘆胡氏世不乏人俄以直龍圖閣知潁昌府歷密州卒

胡宗愈字元夫宿之從子舉進士甲科英宗嘗問宿子弟誰可繼卿者以宗愈對召試學士院神宗立擢同知諫院王安石以李定爲御史宗愈疏言御史當用論薦不宜任執政意及蘇頌李太臨不草定制坐絀宗愈復封還詞頭安石怒出判真州元

祐初進御史中丞時更定役法書成宗愈言法貴
均一若持兩端則於文有害請刪之哲宗嘗問朋
黨之弊對曰君子指小人爲奸則小人指君子爲
黨君子蓋義之與比者因具君子無黨論以進拜
尚書右丞言者攻之出知陳州徙成都蜀人安其
政召拜禮部尚書遷吏部卒子端修亦以直言入
黨籍

杜杞字偉長以父鎬蔭補將作監簿累遷至度支判
官虞部員外郎廣西歐希範率衆破環州轉攻桂

管勢甚熾仁宗授杞安撫使杞至破白崖等寨及其五洞斬首千餘級復攻環州焚其山林積聚希範走保荔枝峒并擒戮之廣西平除天章閣侍制知慶州蕃酋孟香率部落內附夏人以兵索香詔許遣之杞言彼違約舉兵香不可與因移檄問罪夏人讐服杞博覽強記通陰陽術自推其數曰吾年四十六歲矣卒如其言兄植弟樞皆有時名

蔣昂字希遠義興人仕宋康定初調蒲州司法叅軍爲政不忍杖罰號曰仁主時百姓相約曰有犯仁

主法者衆共斥之訖二載不杖一人復轉涼州經
畧使卒

袁默字思正無錫人父繹爲鄉碩儒默少卓犖中進
士擢京兆府教授入爲司農簿獻無逸傳神宗召
對遷光祿丞太學博士哲宗卽位除湖北轉運判
官默學問淵深人倫宗之謝顯道解論語嘗共辨
確第默字思與熙寧初在太學直講爲學者領袖
與默共號二袁舉進士累遷通判杭州知淮陽軍
詩甚工東坡見其所作有驚心駭目之歎

凌浩字直翁無錫人與同邑陳敏受業於胡安定之門以經術知名治平初登甲科令蓬萊武陟召拜太學博士推安定之學以教多士翕然尊師之出守渠陽年六十五浩與敏皆未及引年而告老人稱其高

丁寶臣字元珍晉陵人與兄宗臣同登景祐初進士俱有文聲尤工於詩時號二丁寶臣以太子中允知剡始至流大姓一人衆皆悅服除弊興利甚衆移知諸暨其治如剡越人咸以爲循吏云後歷秘

閣校理同知太常禮院久處館職英宗深知其賢
每論人材必稱之後爲言者所指出倅永州卒

錢公輔字君倚武進人少從胡翼之學有名舉進士
知明州時衙前法病民爲均其役同修起居注知
制誥英宗卽位陳治平十議王疇爲翰林學士未
久擢副樞密公輔論疇望淺不草制上謂沮格詔
令坐謫呂誨等救之不得踰年起知廣德軍振作
士類重拓學宮神宗立復知制誥人見上勞苦之
使錄十議以進命知諫院嘗白事中書富弼謂曰

上求治如饑渴正賴君輩同以濟公輔曰朝廷
所爲是天下誰敢不同所爲非欲同之不可得
也王安石雅與之善旣執政排異已者出滕甫知
鄆州又主薛向更鹽法議公輔數帝前言甫不
當去向當黜拂安石意罷諫職出知江寧府徙楊
州以病乞越州改提舉崇福觀卒

了騭字公黜晉陵人舉嘉祐初進士以經學倡後進
尤長於易春秋爲文自成一家有文集二十卷李
定用事辟騭爲屬以疾辭蘇軾曾肇孔文仲輩交

薦騰司馬光當國騰謁之獨後光曰真自重之士
也除太常博士改左右正言元祐間士風險競相
爲朋比有五鬼十物之號騰上疏請窮治之後出
知處州

蔣之勉字敬叔宜興人博通圖典爲西澗大儒屢薦
不仕號荆南先生

蔣之奇字穎叔宜興人堂從子嘉祐二年進士英宗
初選殿中侍御史陳謹始五事進忠賢退奸邪納
諫諍遠近習聞女謁凡數百言時論偉之歷江淮

荆浙發運副使元豐六年漕粟京師至六百二十萬石鑿泗州股河以避長淮之險無覆舟之患哲宗朝知廣州以平寇功除寶文閣侍制知熙州議斥堠修守備羗不敢犯紹聖中鄒浩以言事獲罪之奇折簡贈別坐責守汝州徽宗立復爲翰林學士拜同知樞密院崇寧初除觀文殿學士知杭州善經學工詩文有文集雜著百餘卷卒封魏公

蔣璿字夢錫之奇子登元祐初進士擢大司樂與梁師成議樂舞不合師成怒璿曰一代典禮當質諸

經何用怒爲不顧而去時燕雲初復廷臣議上尊
號璫言裕陵卻尊號爲萬世法柰何諛悅以虧盛
德出知興元府王靖作亂擒戮之撫平其黨後引
疾奉祀鴻慶宮

蔣燦字宣卿早喪父鞠於世父魏公之奇卓越不凡
魏公器重之以之奇蔭奏補將仕郎歷知平江臨
安二府後以侍郎守臨川告老遷太中大夫提舉
玉龍觀卒燦善爲詩孫覲稱其奇麗清婉咀嚼有
味其擬東坡作詩律句法則蘇詩中殆不可辨有

景坡堂詩卷

蔣興祖之奇孫以蔭調饒州司錄睦州盜起旁郡皆
震興祖糾吏卒繕戰具盜不敢犯遷知武陽治爲
畿邑最武陽古浪沙也土脉脆惡大河薄其南每
積雨必隄潰興祖董治之露宿隄上彌四旬隄完
不壞靖康初金兵犯京師過其邑或勸使逃避興
祖曰吾世受國恩當歿於是監兵與賊通斬以殉
金數百騎來攻不勝去明日復益兵來衆寡不敵
興祖與其妻子俱歿詔贈朝散大夫

蔣芾字子禮之奇曾孫紹興末進士授建康推官秦
檜欲羅致爲已用芾堅拒之故終檜之身不得召
用孝宗朝累遷起居郎兼直學士院宦者梁珂撓
權尹穡論之罷穡芾抗顏繼奏語徹德壽宮上皇
歎其忠除簽書樞密院事累遷右僕射中書門下
平章事屢疏條奏邊防軍政甚悉母喪去位詔起
復之芾力辭帝銳意恢復手詔使決和議恢復二
策芾以天時人事未可舉兵凡二千餘言拂上意
尋落職提舉洞霄宮卒

單錫字君錫宜興人嘉祐二年進士明陰陽圖緯星曆之學蘇軾賢之以女兒之子妻焉弟鏐字季隱亦嘉祐間進士詳究吳中水利蘇軾守杭問之因出水利書并圖以獻軾上于朝不果行遂隱居不出仕鏐子發舉八行科修陽羨風土誌錫孫時字行可宣和末進士累官監察御史上封事言飲酒擊毬二事孝宗嘉納尋除右諫議大夫上目疾久不眎朝復疏諫上曰卿言可爲愛朕矣及卒上爲悵悼

康大熙宜興人皇祐元年進士神宗朝陳襄在經筵以治行薦及臺閣選所薦三十二人大熙與胡宗愈皆預焉累遷至侍讀

張巨字徽之武進人嘉祐初舉明經少從胡安定學與蔣之奇胡宗愈丁騭爲四友又學易于歐陽修以薦充國子監直講王安石新經行巨與同官數人引去時論高之有易解十卷文集四十卷

陳敏字伯修無錫人少孤廬於墓所受業安定之門安定一見奇之曰此錫山之英也熙寧初舉進士

徽宗朝諸蔡用事斥司馬光諸賢爲姦黨令州郡
皆立石時敏守天台曰誣司馬公是誣天也碎石
掛冠而歸大觀中詔求八行有以敏薦守令勸駕
歎曰昔歸今往出處何戾耶弗就蘇軾遺書與之
曰風氣凋喪植立于頽波狂瀾中惟吾伯修與景
純而已

景純謂乃學士也

年八十一終于家

沈初字子深無錫人熙寧中進士文辭典麗元祐尚
辭賦朝廷嘗以初及林希佚等五賦頒天下爲格
流傳至西夏人織爲文綺官終國子監直講

錢顗字安道無錫人舉進士爲寧海軍節度推官守
用威嚴僚屬奔走聽命顗當官而行無所回撓由
是獨見器重熙寧間召爲御史裏行王安石行新
法宰臣曾公亮依違不言顗疏安石談堯舜以致
公輔首財利以爲容悅公亮畏避固寵貶監衢州
鹽稅將出臺責同列孫昌齡曰君奴事安石得御
史自以爲得計不少念報國大疑不若卽拂衣上
馬去聞者悚然後徙秀州家貧母老貸於親舊以
給朝晡怡然自適蘇軾遺之以詩有烏府先生鐵

作肝之句世因呼爲鐵肝御史

許德之字振叔無錫人父希道爲鄉宿儒授四子各一經德之最穎悟舉進士爲揚州法曹與晁詠之韓韶蘇象先同爲椽號維揚四雋侍臣薦其才徽宗召對言治道無多術惟在進賢退不肖有賢不能用與非賢而遽信皆無益於治擢司封郎中終顯謨閣學士知婺州

王岡字壽祺無錫人嗜學耽書登進士第通判揚州丞相呂頤浩統戎辟置幕下高宗南渡頤浩爲御

營使以岡爲叅議官多用其籌策紹興間歷左司
郎願浩去國岡以朝散大夫直秘閣致仕

余中字行老宜興人幼穎悟熙寧五年與兄貫試禮
部中選而貫被黜請自黜以薦兄士論高之明年
復魁大廷紹聖初使虜還奏河朔城隍墮圯乞葺
治以戒不虞宣靖間金人來寇城多不堅長驅而
南始思其言終雪川守

邵材字聖規宜興人熙寧間試開封第一與父潛同
舉進士嘗爲監察御史郡上疑獄刑部議當貸死

用事者謂不當貸仍欲坐言貸者材抗言疑獄當
貸而奏者反獲罪恐獄吏由此便文自營不復以
疑獄聞矣時司馬光極論新法之害王安石語材
劾光材曰君實正人可厚誣乎卽日自劾而歸後
終鴻臚卿

強翊字君翔晉陵人元豐五年除河南密尉調金壇
簿時章惇少與翊善後惇漸人傾險翊心惡之惇
居潤時翊任屬邑惇問慰殷至而翊未嘗通一書
及惇以宰相起知交讓翊失策怡然自若徐曰諸

公以此爲獵華膺地耶尋引年致仕

李堪字仲任常州人舉進士景德間令古田務本抑
末建學立社尊高年行鄉飲毀淫祠黜異教暇復
集諸生耆民討論政理治化翕然

錢道人逸其名顓之弟也隱慧山與東坡遊道人有
詩云直須認取主人翁東坡爲作兩絕戲之曰首
斷故應無斷者冰消那復有冰知主人苦苦令儂
認認主人人竟是誰有主還須更有賓不如無鏡
自無塵只從半夜安心後失却當年覺痛人已又

贈以詩云毘陵高山錫爲骨陸子遺味泉水齒
賢哉仲氏早拂衣占斷此山長洗耳

許恕字如心江陰人家北郭號北郭先生能詩得古
體論事多激昂部使者薦授澄江書院山長不樂
卽棄去與山僧野子相往還人莫識也恕少有志
才能自樹會天下多故去之海上慕韓伯休爲人
旁通其術所著有北郭集

劉谷字季朴江陰人有隱操熙寧間嘗召爲修撰尋
復辭去蔣靜自宜興來學谷一見許妻以女及卒

蕭挽以詩云行藝已書丞相筆姓名還結裕陵知
又云他日如尋隱君子女山深處一孤墳

呂大策字彥發江陰人善詩尤精於書被詔不就人
號曰呂詔君

錢卽字中道宜興人舉進士授安州司理申理冤抑
轉睦州推官有獄久不決部使諭往按治且啖以
薦牘卽曰豈以數十人命易一薦牘乎平反之全
活甚衆歷鄜延環慶經畧安撫所至有聲績童貫
宣撫陝西頓減市價賤入民粟關內騷然卽屢抗

章極陳其害坐貶永州團練副使睦寇作亂起知
宣州悉意軍事以功進龍圖閣學士貫引爲叅謀
卽以老固辭致仕卒謚忠定

龐安仁字宅道晉陵人通五經尤長於易張正素鄒
道鄉諸賢皆執經受業

張舉字子厚武進人登進士甲科以無他兄弟不忍
離親調官不赴閉戶讀書四十年手校數萬卷元
豐元祐間大臣交薦詔拜秘書郎敕郡縣敦遣竟
不就舉孝弟修于家忠信行于友蹈中守常爲名

流所重以不造門爲耻卒賜謚正素先生

沈積中晉陵人舉進士累官戶部尚書宣和中知其
定府上疏論燕山不可取師果敗績童貫惡之奪
其職建炎中追復資正殿學士

周孚先字伯忱晉陵人偕弟恭先往河南從程伊川
學與楊龜山相友善伊川每謂孚先兄弟氣質純
明可與入道在門凡十七年同門擬之子夏恭先
服膺拳拳惟以顏子爲法聞父疾兄弟徒步馳歸
五日抵家父已卒哀甚牛馬亦爲之淚下不食鄰

人曰
婦至以感傷而歿既葬因廬於墓免喪聞伊川訃
復馳至洛歸而爲城東書院以祀二程生徒自遠
至者衆不能容又於城西創書院尊先主教於東
恭先主教於西楊龜山先生至郡遂以城西書院
館焉謂諸生曰先生實去予兄弟百倍此真爾師
也予先由鄉薦入太學特恩調四明鹽場改建德
尉皆不就命白衣上殿賜承事郎改奉議司祠後
爲臨安教授所著有伊川語錄論語解紹興間郡
守黃公灝奉先生兄弟附饗城

周恭先字伯溫氣質淳厚篤信好學諸同游咸心讓
之由鄉薦入太學釋褐授坑冶幹官每以沽名爲
戒終身恬于進取謂子孫曰吾沒後毋爲誌文碑
銘以重吾不德

鄒浩字志完晉陵人登進士第調揚州潁昌府教授
呂公著范純仁爲守皆禮遇之元祐中上疏論人
才不振切中時弊哲宗親擢右正言有請以王安
石三經義發題試舉人者浩論其不可而止章惇
用事威虐震赫浩上章露劾數其不忠慢上六事

惇衛之明年賢妃劉氏立浩遂上言郭后與尚美人爭寵仁祖既廢后并斥美人所以示公也陛下之廢孟氏與郭后無異罪廢之初天下疑立賢妃詔書有別選賢族之語疑始釋今竟立之豈不上累聖德頃妃從享景靈雷變甚異宣制之後霖雨飛雹陰淫不止天意昭然望不以一時改命爲難而以萬世公議爲可畏帝持其章躊躇四顧凝然若有所思乃付外章淳誡其在妄遂削官歸管新州徽宗立亟召還朝帝首及諫立后事獎嘆再三

詢諫草安在對曰焚之矣退以告陳瓘瓘曰禍其
始此乎異時姦人妄出一紙則不可復辨也初劉
后爲賢妃生子緣是得立然生子纔三月薨浩凡
三諫隨削其稿蔡京用事素忌浩乃使其黨爲僞
疏言劉后殺卓氏而奪其子徽宗詔暴其事遂寘
昭州五年始得歸疾危楊龜山往省之猶惓惓以
國事爲問高宗卽位贈寶文學士謚曰忠浩爲人
忠鯁脩潔記覽該綜士之及門問道者甚衆自領
表歸卽屏居小園號曰道鄉學者稱爲道鄉先生

所著有易繫辭論語孟子解

鄒柄字道久浩之子莊重篤學幼負俊聲弱冠棄科舉從龜山楊時游靖康初自布衣薦除編修建炎間疏請雪其父遷謫非辜且不出忝陵雅意奏可柄素剛鯁與人不苟合克世家學終天台守

唐棣字彥思宜興人從伊川學語以入德之門無如大學其他莫如語孟棣自是有所悟人又嘗問聖人之言可踐否伊川曰苟不可踐何足以垂教萬世他日又問克已復禮如何是仁皆得其說纂次

伊川語錄百四十餘條又復推演師說官終秘書丞

霍端友字仁仲武進人弱冠入太學通六經崇寧初進士第一歷官大司成上言朝廷重內輕外可令內外侍從更出迭入俾天下之勢常如持衡庶首尾無軒輊之患且自請補郡出知陳州爲政不立聲威陳地汚下疏新河達淮無積潦詔取瑞香花於陳端友曰不可自我作偏疏罷之召還爲吏部侍郎蔡京令人致意欲以中執法相處端友不答

遂致仕卒贈少師

霍洞字大清端友從孫喜爲詩居城東之梅坡自號
筠寮嘗宿田舍見吏催科詩云北風吹晴屋滿霜
翁兒赤體悲無裳閨中幼婦饑欲泣忍饑取蔴燈
下緝一身勿暇私自憐鳴機軋軋明窓前織成五
丈如霜布翁作襦裙兒作褲明朝官中催租急依
然赤體當風立又歲饑見守者出游詩云朝來五
馬去尋春誰信家家甑有塵枕席道傍宜細問恐
非芳草醉眠人守聞爲之罷游

李謨字茂嘉無錫人幼孤家貧力學孝養其母登進士第微宗知其才擢太常寺器選實文閣校鎮京口卒謨歷事三朝皆蒙信任屬當時艱智畧精敏隨事應變稱爲奇才

毘陵人品記卷三

毘陵人品目四

宋

李綱

張守

胡交修

李端彥

李端行

施垵

唐作求

沈松年

沈有開

費肅

孫衮

胡唐老

胡世將

胡埕

蔣循祖

李熙靖

吳懋

葛勝仲

兄次仲
十立方

葛邲

袁植

吳範

蔣靜

吳師古

陳之茂

陳之淵

左表

子業
籍隸

喻樗

陳篆

蔣汝通

元簿

陳得一

呂克成

周葵

戴達先

邵及之

耿秉

李祥

蔡戡

丁逢

錢之望

丘岳

丘定夫

張訢

薛極

蔣重珍

向士璧

錢相

趙發

胡鏜

李晦

包天麟

曹岳

姚嘗

陳炤

胡應炎

徐道明

莫謙之

蔣捷

曹岨

錢紳

董蕃

繆鑑

昆陵人品記卷四

宋

李綱字伯紀祖賡自邵武徙居無錫登政和二年進士以敢言著聲及金人攻汴徽宗傳位太子自稱道君除綱兵部侍郎金兵渡河徽宗東幸宰執議請欽宗暫避敵鋒綱力陳不可去之意上意頗悟會內侍奏中宮已行上色變綱泣拜以死邀之未幾復決意南狩綱趨朝乘輿已駕矣綱入見曰六軍父母妻子皆在都城願以死守萬一中道微歸

陛下孰與爲衛上感悟命輟行綱傳旨語左右曰
敢復有言去者斬禁衛皆拜伏呼萬歲綱治守戰
之具不數日而畢敵兵攻城綱身督戰斬酋長十
餘人衆數千人金人乃退求遣大臣至軍中議和
綱請行不聽遣李梈金人須金幣以千萬計求割
太原中山河間地以親王宰相爲質梈唯唯不能
措一辭還報綱引前議力爭弗聽以皇弟康王少
保張邦昌爲質時四方勤王之師漸有至者綱奏
言金人兇悖已甚非用師不可吾若扼河澤絕饒

道以重兵臨敵營堅壁勿戰俟其食盡力疲以一
檄取誓書復三鎮縱其北歸半渡而擊之此必勝
之計也上深以爲然姚平仲勇而寡謀先期率步
騎夜斫敵營不克亡去金使來詰用兵之故宰相
李邦彥悉委罪於綱欲縛綱以與金金使反以爲
不可遂罷綱太學生陳東等詣闕上書明綱無罪
軍民不期而集者數十萬哭聲動地帝亟召綱綱
入見泣拜請死帝亦泣命綱復克京城四壁守禦
使下命能殺敵者賞衆無不奮躍金人懼稍稍引

却徽宗還綱迎拜龍德宮北兵已去上下恬然置
邊事於不問綱獨以爲憂議調防秋之兵奏言邊
患方棘調度不給宜稍抑冒濫以足國用時太原
圍未解耿南仲忌綱以綱爲河東北宜撫使綱移
疾乞致仕不許又乞展行期御批以爲遷延拒命
趨召數四綱曰臣以愚直不容于朝此行無復還
理進而歿敵臣之願也陛下宜察臣孤忠以全君
臣之義上爲感動陛辭言唐恪蕭山之姦未幾相
恪山綱嘆曰事無可爲矣卽日乞罷乃召綱赴闕

以綱專主戰議喪師費財落職金兵再至上悟和
議之非召領開封府事綱被命卽率勤王之師入
援未至而都城失守高宗卽位拜尚書右僕射趨
赴闕御史顏岐論綱爲金人所惡不宜相不報岐
乃封示綱以沮其進綱曰國家艱危豈臣子避嫌
疑自愛惜之時遂行進對內殿涕泗交集上爲動
容綱疏陳十事一議國是二議巡幸三議赦命四
議僭逆五議僞命六議戰七議守八議本政九議
久任十議修德翌日班綱議于朝惟僭逆僞命二

事留中綱言二事乃今日政刑之大者大率言邦
昌能以死守節敵人未必不悔禍而邦昌偃然正
位號擅止四方勤王之師及知天下不與方請太
后垂簾聽政而議奉迎僭逆如此不正其罪而反
尊崇之此何理也又僞命臣僚一切置不問何以
勵士大夫之節時黃潛善主邦昌甚力綱因泣拜
曰臣不與邦昌同列當以笏擊之乃詔邦昌知潭
州吳玠莫儔而下皆遷謫有差綱又言近世士大
夫寡廉鮮耻不知君臣之義靖康之禍能仗節死

義者惟奪若水霍安國願加贈恤上從其請上謂
綱曰卿昨爭張邦昌事內侍輩皆涕泣卿今可以
受命矣綱拜謝有旨兼統御營使疏請置東北招
撫司河東經制司使宣諭天子恩德不忍棄兩河
于敵國之意絕其從敵之心資其禦敵之力使朝
廷無北顧之憂因薦張所爲河北招撫使傅亮爲
河東經制副使有詔欲幸東南避敵綱極論其不
可不報而遷綱尚書左僕射除黃潛善右僕射與
綱並未幾詔罷經制司召傅亮赴行在綱言必欲

罷亮乞付潛善施行臣得乞身歸田綱退而亮竟
罷乃再疏求去御史張浚論劾綱遂落職自綱罷
張所以罪去傅亮以母病辭歸招撫經制二司皆
廢車駕遂東幸兩河郡縣相繼淪陷凡綱所規畫
軍民之政一切廢罷金人攻京東西殘毀關輔而
中原盜賊蜂起矣紹興二年除知潭州五年召赴
行在車駕進發幸建康八年王倫使北還綱上疏
曰朝廷遣王倫使金奉迎梓宮今倫與金使偕來
以詔諭江南爲名不著國號而曰江南不曰通問

而曰詔諭此何理也雖與衆論不合上不以為忤
九年除知潭州荆湖南路安撫大使綱具奏力辭
曰臣區區進退何足多少然數年之間亟奮亟躡
上累陛下知人之明實有係於國體詔以綱累奏
不欲重違遂允其請次年薨年五十八訃聞上為
嗟悼贈少師綱負天下之望以一身用捨為社稷
生民安危雖身或不用用有不久而其忠誠義氣
凜然動乎遠邇每宋使至燕山必問李綱趙鼎安
否其為遠人所畏服如此自號梁溪漫叟有梁溪

集易傳內外篇等書

張守字子固晉陵人登進士第除監察御史建炎初
上在維陽粘罕將窺行在宰臣汪伯彥黃潛善以
爲不足畏葉夢得張浚皆欲南渡守獨抗疏上防
淮渡江六事又疏請大臣惟以選將治兵爲急汪
黃不悅遣守撫諭京城守聞命就道因上言金人
必來寇願早爲之所不聽遂有臨安之幸遷御史
中丞論朱勝非不能思患預防致苗劉猖獗勝非
竟罷呂頤浩初相舉行司馬光之議欲併合三省

詔侍從集議守言光議較然可行毋徒集衆紛紜
衆莫敢異議者將奉上幸武昌爲趨陝之計守與
康勝皆持不可又陳十旨議遂寢六月久雨恒陰
詔言闕失初守爲副端上疏言陛下處宮室之安
則思二帝母后穿廬毳幕之居享膳羞之奉則思
二帝母后羶肉酪漿之味服細暖之衣則思二帝
母后窮邊絕塞之寒苦操子奪之柄則思二帝母
后語言動作受制於人享嬪御之適則思二帝母
后誰爲之使令對臣下之朝則思二帝母后誰爲

之學禮至是復申其說金人寇淮諸將獻俘行在
守疏兩河山東皆陛下赤子驅迫以來諭以恩信
賊兵可不戰而潰守在福州上詔問攻戰守備綏
懷措置四事守言四者莫急于措置措置苟當則
餘不足爲陛下道矣措置之大畧有二其一措置
軍旅神武中軍當專衛行在而以餘軍分戍三路
一軍駐淮東一軍駐淮西一軍駐鄆岳或荆南擇
要害以處之使北至關輔西抵川陝血脉相通號
令相聞有唇齒輔車之勢則江南斯可奠枕而臥

也其二措置軍食諸軍旣分屯諸路則所患者財
穀轉輸也今宜舉兩浙之粟以餉淮東江西之粟
以餉淮西荆湖之粟以餉鄂岳荆南量所用之數
責漕臣將輸而歸其餘於行在錢帛亦然措置旣
定俟至防秋復遣大臣爲之統督使諸路首尾相
應綏懷之畧亦在是矣張浚罷劉光世兵柄而欲
用呂祉於淮西守言必得門望素服諸將心者乃
可浚不聽遂至酈瓊之變江西盜賊未息守知洪
州開諭群盜使之自新數月悉平建康關帥上曰

此重地也須大臣有德望者無如張守至鎮數月卒謚文靖

胡交修字已懋晉陵人崇寧初進士首選詞學兼茂科歷遷學士兼侍講首論天下大勢謂淮南無藩籬之衛湖廣有腹心之憂江浙根本未立秦蜀指臂不相救宜詔大臣修政事選將帥蒐補卒乘以張國勢撫綏疲瘵以固國本又應詔論弭盜保民豐財裕國強兵禦戎之要語皆切至累遷刑部尚書江東留獄追逮者尚六百餘人交修言待六百

人俱至則瘦死者衆矣請以罪狀明白者論如律
疑者從輕詔從之朝論欲以西蜀交子行於諸路
又議大舉交修皆力陳其害上問蜀帥於交修以
從子世將對後果爲名帥自重兵守蜀餉道險遠
水陸皆梗交修言三月以後九月以前留守關正
兵餘悉就糧他州則守關者水運可給分戍者陸
運可免詔行其議後以端明殿學士知合州請免
上供以萬計在州數月卒交修簡重寡言進止有
度爲文不事彫琢自其從祖宿從父宗愈至交修

及世將皆在禁林中與以後學士三人者自交修始

李端彥字相之武進人父鎮舉進士以詩名端彥博學多聞崇寧初登第臚傳丙科祐陵覽其對曰直諒可嘉特陞甲科仕至宗學博士

李端行字正達無錫人弟尚行字師尹俱有俊聲同登大觀初進士端行爲太學博士高麗遣子入學用夷禮端行曰吾聞用夏變夷以國禮繩之嘗作詩詆蔡京出宰鄞縣發憤乞閒終身不復仕尚行

宰蕭山治行顯著召爲太學博士累遷江南吏道
轉運使以言事去職賦性嚴憚學易深造日抄萬
言閉戶讀書罕窺其面

施垆字林宗武進人登進士第宣和末除江西提刑
朝命鑿銀林河通大江垆懼導江入浙則蘇秀必
受漂溺之患亟疏寢其役徽宗下詔獎諭進秩一
等持憲閩浙守信州有能聲終敷文閣侍制生平
篤意孝養得親書必冠帶跪讀遇恩奏補先及弟
姪鄉邦稱焉

唐作求字叔孝無錫人舉進士公卿薦之徽宗召對
稱旨累官朝散郎致仕學術該敏家訓嚴肅振勵
後進唐氏自作求以儒名家從弟字益裕亦有
識嘗遍謁元祐君子談論移日皆窺其奧

沈松年字性仁無錫人登進士靖康之際丐歸田里
以圖史自娛女弟適洪忠宣皓皓使虜歲久松年
敦誨諸甥皆中博學弘詞科迺入相遵位樞密適
入翰苑名聞夷夏時謂非是舅不能有是甥云
沈有開字應先松年之子少從呂伯恭游學志其大

者不務華藻口耳陶然自樂登淳熙間進士爲太
學博士下簾重屣不妄請謁留丞相異之揖與語
聳聽移日丞相拔擢淳熙知名士有開陰贊之不
以爲功遷秘書丞寧宗卽位召入禁內問民疾苦
遷起居舍人忌者排以爲學黨坐廢十年屹然不
爲動起知徽州復改知太平強使應命輒乞休以
直龍圖閣致仕家居落寞終日危坐時貴者求見
皆辭以老疾而獨與朱晦翁通書問焉

費肅字懿恭無錫人少穎秀嗜學登進士第靖康末

高宗開大元帥府於鄆肅主餽運罷歸隱錫山建炎末以薦召赴行在時被召者三人獨肅抗節引辭不起天下高之孫衮博學能文中進士著梁溪漫志

胡唐老字俊明宿之曾孫父嘗夢披金甲者兩神人告曰吾唐世老將後生子長名唐老次名世將同登進士第靖康初擢殿中侍御史金人再犯京師攻圍日急唐老請封曰康王北使爲河朔士民所留殆天意也請就拜大元帥俾召天下兵入援從

之時朝廷趣西北兵入衛而不立帥唐老謂必無
功不聽後范致虛果以孤軍敗滑澠間京城破金
人搜括金銀民間多藏匿者金人怒殺唐老幾人
後知衢州苗傅敗走亂兵圍城唐老拒之會大雨
雹城上矢石俱發賊解去以功擢秘閣修撰歷知
鎮江府兼浙西安撫使建康失守潰卒戚方等趣
鎮江城頗兵少方欲脅之以犯臨安唐老怒罵不
從遇害詔贈徽猷閣直學士謚忠愍

胡世將字承公初爲監察御史累遷兵部侍郎紹興

聞師蜀奏用轉搬摺運之法以充軍儲公私便之
從祖修簡嘗師成都有治行父老曰不圖再見吾
父人方之張詠號小乖厓金人陷同州世將駐師
河池或勸以退保世將指所坐帳曰吾誓死于此
矣遣大將吳璘等出屯要害金人逡巡不敢度隴
得全師而還母喪起復遂復隴州破岐下等屯兵
威稍振以瘍發致仕卒謚忠獻

胡程字德輝晉陵人宣和初進士嘗受學於楊龜山
又介龜山謁劉元城於南都問答論辨皆得其精

蘊而元城許理能護至道理乃以其所聞退而筆
之爲護道錄先是陳東上書攻六賊言者以其書
乃理所潤色忌之又與李綱同舟東下貶梧州趙
鼎當國以熙豐元祐舊史蕪穢屬理與張嶠修正
鼎去位理出守嚴陵鼎復相又舉理與嶠筆削成
書時秦檜力主和議理與同館朱松等抗疏忤檜
引去疏詞侃侃皆理手筆理安貧樂道至老好學
不倦爲一時表正云

蔣循祖宜與人歷知建昌軍問民疾苦宣布詔條賞

善懲惡民大和會游操謂其治行慕黃霸及於土木之役終始經營不愆于素方之精力當出霸右李熙靖字子安晉陵人唐衛公德裕九世孫祖均父公弼至熙靖皆舉進士而熙靖又舉詞學兼茂科累官太學博士以父老乞便養除提舉淮東命下乃得河東而淮東乃臧祐之也蓋省吏納賂易之或使自言熙靖曰事君不擇地吾其發人之私求自便邪宰相聞而賢之留爲兵部員外郎以父憂去見忌於王黼蔡攸留滯貶秩者累年徽宗召對

言燕山雖定宜益思患豫防兩宮北狩虜立張邦
昌熙靖憂憤廢食家人進粥藥寃解之終無生意
故人視其病相持啜泣索筆書王維百官何日再
朝天之句而卒贈端明殿學士

吳懋字禹功宜興人第進士調當塗縣主簿歲饑官
出粟糴者盆集人擾亂相蹂踐以歿懋命布灰於
地疎其行坐循灰以進左受粟右輸金未晡而周
人無譁者縣有圩田秋雨圩決懋晨夕督治民賴
以濟移宿松以簡靜爲治凡追逮者書期縣門聽

其自至田里間不識游徼舊夫之面縣稱大治金
人立張邦昌百官作勸進表懋當草歲將自裁會
有爲之者乃免王時雍用事坐政事堂懋罵之曰
反虜吾不能擊汝如段秀實邪時雍面頸俱赤不
能對後吳玠莫儔以表狀詣虜營懋不屈歸高宗
卽位召復故官除司農卿不拜擢知明州治聲流
聞加直秘閣改知吉州尋卒

葛勝仲字魯卿書思之子登紹聖初進士調杭州司
理叅軍薦試學官及詞科皆第一歷遷太學正上

視學多獻頌勝仲獨獻賦遷禮部員外郎兼國子
司業雅樂成遷太常卿宋自建隆至治平所行典
禮歐陽修嘗與爲書百篇號太常因革禮勝仲續
之增至三百篇及建春宮以勝仲爲諭德作仁孝
學三論獻之太子復采春秋戰國以來太子善惡
成敗之迹日進數事詔嘉之進國子祭酒尋知汝
州論括田擾民爲李彥所劾徙鄧州爲朱勔所惡
尋罷建炎中起復湖州時羣盜縱橫聲搖諸郡勝
仲修城堡作戰船閱士卒賊不敢近歲大饑發官

廩賑之民賴以濟紹興初再知湖州乞歸十餘年而卒謚文康兄次仲字亞卿亦嘗爲大司成子立方第進士以郎官攝西掖忤秦檜奪職更化召用言者又以附會沈該罷去遂不復起

葛邲字楚輔勝仲孫少警敏以國器稱蔭授上元丞金人犯江上元當敵衝調度百出邲不擾而辦後登進士第除國子博士論州縣受賂及鬻爵之弊孝宗獎諭之除著作郎歷正言首疏治亂生於所忽宜專以畏天愛民爲先又論征權歲增之害詔

令條陳邲對以六事切中時病歲旱詔求初政得失邲應詔言罷兵以來諸將皆以賂得遷其勢必至於掊剋取償邲爲宮僚八年孝宗眷遇甚渥光宗受禪除叅知政事邲勸上專法孝宗正風俗節財用振士氣執中道恤民力選將帥收人材擇監司明法令上嘉納之除知樞密院事紹熙中拜右丞相專守祖宗法度薦進人材博采公論寧宗卽位邲又上疏言今日之事莫先於修身齊家結人心定規模判紹興府錢穀刑獄必親嘗曰十二時

中莫欺自己其實踐如此除少保致仕卒贈少師
謚文定配享光宗廟庭

袁植字材老無錫人崇寧間進士中詞學科擢監察
御史金人入寇陳安邊十三事以誅佞人爲先不
納引疾去建炎初召爲左司諫直言忤宰臣出守
岳陽會虜騎大入叛臣李允文擁衆怙亂植條奏
其奸允文怒執植正色詆賊不少懼遂遇害允文
誅追贈龍圖閣學士

吳範字執侯江陰人大觀政和間詔舉八行閭里以

範應不就子仲基仲達皆第進士

蔣靜字叔明宜興人第進士調安仁令俗好巫疫癘
流行病者寧死不服藥靜悉論巫罪毀淫像投諸
江知陳留縣與屯將不協罷去徽宗初立求言靜
上言多詆元祐間事遷國子司業帝幸太學命講
書無逸篇賜服金紫進祭酒以顯謨閣侍制知壽
州徙江寧府茅山道士劉混康以技進賜號先生
其徒倚爲姦利奪民葦塲墮市廬舍府吏觀望不
敢治靜悉抵於法徙睦州移病提舉洞霄宮越九

年召爲大司成出知洪州復告歸加直學士卒年七十一

吳師古宜興人舉進士紹興中秦檜主和議胡銓抗疏得貶師古鋟其疏傳諸夷夏坐流袁州

陳之茂字卓卿無錫人與張九成俱廷對忤權相黜之九成叩頭殿階曰臣之學不如陳之茂之茂能言人所不敢言宜獎不宜黜高宗覽其對悚然曰忠言也賜同進士出身調休寧尉以經學爲諸儒倡張魏公嘗薦之于朝仕至吏部侍郎終直學士

院之茂剛果英特論議宏遠深識治體壽皇初銳
意天下事默察方正特立之士期立事功每深器
待將倚以大用而沒縉紳惜之

陳之淵字宗卿與兄之茂同入太學同登進士同爲
吏部郎中終秘書修撰立朝涖官不治貨產澹泊
自如未嘗以名位矜人人皆服其厚德

尤袤字延之無錫人擢進士第爲泰興令鳩工築城
金陷揚州獨泰興得全太宗正閏丞人爭求之陳
俊卿曰當予不求者遂除叅秘書丞缺食以袤對

張拭曰真秘書也尋遷著作郎兼太子侍讀出典
台州築城高厚明年大水賴以不沒除淮東提舉
改江東推行朱子荒政民無流殍累遷樞密院正
兼左諭德高宗崩除太常少卿自南渡來典禮散
失上下罔措每有討論悉付表斟酌損益定廟號
建議事堂命皇太子參決庶務表以儲副之位止
于侍膳問安乞懇辭以彰殿下之德臺臣乞定喪
制表奏佛老之教矯誣褻瀆非所以嚴宮禁宜一
切禁止孝宗嘗論人才表奏曰近召趙汝愚中外

皆喜如王蘭亦望收召上曰然次日語宰執曰尤
表甚好兼中書舍人復詔兼直學士院力辭且薦
陸游自代上不許光宗卽位屢以謹始爲言又舉
唐太宗不私秦府舊人爲戒紹熙元年起知太平
州除給事中華侂冑以武功大夫和州防禦使表
奏侂冑四年間已轉二十七年合轉之官今又欲
超授四階是朝廷官爵專徇侂冑之求非所以爲
摩厲之具也命遂格上以疾一月不省重華宮表
上封事勿憚一日之勤以解都人之惑後數日駕

卽過重華宮中外歡呼尋轉侍讀上封事曰近年
以來給舍臺諫議事往往不行至姜特立召尤爲
駭聞自古云小人甚難譬除蔓草猶且復生況加
封植乎時上已屬疾國事多舛叅積憂成疾請告
不報疾篤乞致仕又不報遂卒年七十謚文簡叅
少從喻樗汪應辰游樗學於楊時時程頤高弟也
方乾道淳熙間程氏學稍振忌之者目爲道學將
攻之叅在掖垣首言道學者堯舜所以帝禹湯文
武所以王周公孔孟所以設教近立此名誣謗士

君子賢人君子欲自見于世一舉足卽入其中豈
盛世所宜有表歿數年佐冑擅國禁錮道學賢士
大夫皆受其禍識者以爲知言子裴爲工部侍郎
孫煥初爲將作監主簿後帥淮西以儒者守邊威
惠並濟終翰林學士

喻樗字子才其先祥符人高宗南渡徙桐廬後至無
錫居焉少慕伊洛之學從楊時游登建炎進士爲
人質直好議論嘗謁趙忠簡諷之曰公之事上當
使啟沃多而施行少誠意多而語言少趙奇之引

爲上客紹興初趙贊高宗親征樗曰六龍臨江兵
氣百倍然公度此舉果出萬全否趙曰中國累年
退避不振故贊上行若事之濟否未可知也樗曰
然則當思歸路張德遠有重望若使宜撫江淮荆
浙以兵赴闕則其來路卽朝廷歸路也於是趙奏
起張知樞密院張謂趙曰此行舉動皆合人心曰
子才之功也薦授秘書省正字兼史館校勘樗言
趙張宜同在樞府他日趙退張繼之則氣脉長若
同處相位萬一不合賢者自相背戾後果如其言

樗與張九成皆言和議非便忤秦檜出知舒州已而致仕檜死復起爲大宗正丞孝宗卽位用爲浙東提舉常平以治績聞所著有易義四書性理窟行于世

陳篆字師文無錫人氣豪邁讀書過目不忘下筆成文語意俱到傳爲楷式經學尤該明願執弟子禮者遠近交至一出規矩皆爲良士紹興間舉進士官止于州縣子翥亦舉進士

蔣汝通字亨伯江陰人蚤入太學晚乃授官不仕而

去以琴書圖史自娛好古博雅尤邃於性命之學
嘗著質旋以祛支干五行配合之說年八十餘精
勤不衰

元簿字泉卿宜興人幼業進士輒棄去喜爲詩自號
耘軒有歲晚書懷云他鄉故鄉老若此新歲舊歲
窮依然烹茶但有二升水沽酒初無三百錢其處
約安貧亦足尚也

陳得一字晞夫晉陵人崇寧間乘桴至日本得卷書
上丹題付通微三字乃天文日曆也遂精推步之

學高宗朝日食正朔御史張致遠薦得一至秘省
俾正曆差特命以官辭不受賜號通微處士始符
丹題云

呂克成字世德無錫人有俊才學問精確從游者常
數百人與同邑陳師文友善兩浙士子稱師者必
以克成師文爲重克成以恩科第一終蘄州教授
周葵字立義宜興人少力學登宣和末進士調徽州
推官高宗移蹕臨安諸軍交馳境上葵攝郡應變
千里帖然召爲監察御史在職兩月言事至三十

章且指宰相趙鼎不任職上爲改容張浚議北伐
葵謂此存亡之機不可不慎三上章言之或謂葵
沮大計罷知信州秦檜當國意葵前論事必憾趙
鼎於是復以葵爲殿中侍御史一日內降差除四
人葵奏曰願陛下以仁祖爲法大臣以杜衍爲法
檜不樂又論事輒忤檜意落職屏居鄉里憂患頻
仍人不能堪葵獨安之檜死復起爲禮部侍郎奏
科舉取士宜精選通經博古之士置之前列其穿
鑿乖謬者黜之出知太平州州人紀其功德水壤

圩堤葵悉繕完傍郡皆水惟當塗歲熟市河久涸
葵令城中家出一夫官給之食併力浚導公私便
之孝宗卽位除兵部侍郎權戶部手詔數問錢穀
出入葵言陛下咨詢庶政出人意表今皆微文細
故此必有小人欲乘間售其私者不可不察蓋指
龍太淵曾覲也孝宗爲之色動金主爲其下所撓
張浚曰此恢復之機葵謂不可輕舉累數百言始
終守自治之說及靈璧敗績上思其言拜叅知政
事葵固請去上曰卿何請之力也對曰預政以來

大率十事之中不從者七八安得不愧於心此臣
所以欲去也及虞允文陳康伯爲相葵決意去位
除資政殿學士提舉洞霄宮起知泉州請老卒贈
太傅謚惠簡

戴達先字子善無錫人父滂有文行紹興初達先與
第幾先同舉進士行藝並優文體粹然爲之一變
太學諸生稱曰二戴執政有薦達先者高宗召對
擢太學博士孝宗求直言達先條天下利害戰守
事宜召試館職歷知池州江陰軍移袁州爲政長

者心仁貌莊平居恂恂臧否不置口幾先字子微亦以宰臣薦召教諸王稍遷國子司業對便殿論王安石蘇軾學術功利仁義之差上嘉之累遷直龍圖閣號錫谷居士

邵及之宜興人乾道中爲司封郎時和王楊沂中子乞襲封吏部長貳欲上其事及之曰國朝故事異姓王無襲封者雖趙韓王開國元勳及身而已斥去之尋上章請老除直徽猷閣致仕孝宗命輔臣舉漢公卿錢二疏故事由是朝士皆歌餞之爲一

時盛觀

耿秉字直之江陰人登紹興進士出知廣德軍值歲大侵發常平倉活饑民萬餘且自劾矯制之罪寧宗特加獎異歷兵部侍郎兼給事中剛方清儉兩爲浙漕所至以利民爲事終煥章閣待制

李祥字元德無錫人學于尤遂初得龜山之傳登隆興初元進士爲錢塘主簿時姚憲尹臨安俾攝錄叅邏者以上命監視鍛鍊嘗誣武臣子謗訕鞠于獄祥不許邏入門旣而所告無實白尹尹驚弗從

祥曰卽坐譴自甘尹具論如所獻上喜擢官太宗
正丞軍器少監祥言內外賢才宜更出迭人請自
臣始出提舉淮東常平茶鹽淮西運判兩淮錢濫
惡祥疏更鑄新錢淮人以安遷國子祭酒丞相趙
汝愚以韓侂胄嫉言者去國祥力爭曰頃壽皇崩
兩宮隔絕中外洶洶國命如髮汝愚不畏滅族決
策立陛下風塵不搖天下復安社稷臣也奈何使
精忠巨節怫鬱黯闇何以示後世言者劾罷之太
學諸生楊宏中等上書留之俱得罪言者喜曰道

學解散矣後請老以直龍圖閣致仕卒謚肅簡祥
以公心發公論汝愚之誣賴以明道學之禁賴以
解嘗對孝宗言唐虞盛治在君臣和又進五規以
廣上意言恢復事本末有序終始一致旣歸錫山
或叩以立朝事掉頭不答

蔡戡字定夫晉陵人登乾道甲科持節五羊所部十
四郡歲以礦銀爲病戡積鹽羨代輸民甚便之擢
湖南憲使時李昂霄有異謀戡乘其未定單車馳
喻之其黨相顧駭愕叩首服罪寧宗朝爲京兆歲

游羅艱哉亟請發粟民賴以濟韓侂冑當國乃請
老有定齋集行于世

丁逢字端叔晉陵人乾道初進士爲激賞所幹官金
主遣使賀上生辰怙貴驕黷侮館伴衆憤莫能制
逢曰示弱何以爲國上書乞借上方劍斬虜使書
奏御筆付宰相曰此人才氣可尚卿先一見速具
奏來遂賜對遷天府倅上方留意邊事命逢知安
豐盱眙二軍皆有政績除川秦茶馬凡供帳公費
悉屏去人服其廉介而馬政修舉召還歷卿監終

寶謨閣侍制

錢之望字表臣晉陵人少放達好奇計逆亮闖江以策干虞允文謂虜有內潰之勢允文用其策亮果殞符離之敗之望道謁張忠獻請三邊並出師使虜罷于奔命則大功可立忠獻不能用之望登乾道中進士授江西帥屬時賴文政猖獗朝廷盱眙食叅政龔茂良薦之望遂俘文政除金部郎知楚州募力士五百人躬自訓閱虜不敢謀大吳山盜起除秘閣修謨知廣州一戰滅賊擢華文閣侍制知

廬州卒

丘岳字宗卿江陰人隆興初進士虞允文奇其才舉
以自代賜對言恢復之志不可忘恢復之事未易
舉宜甄拔實才責以內治遵養十年乃可議北向
時方遣范成大祈請陵寢岳言無益大計徒以驕
敵孝宗不悅出知秀州華亭捍海堤久廢鹹潮壞
田蘇湖皆受其害岳奏剗築堤成而三州瀉瀦皆
爲良田除直秘閣知平江府奏楮幣折閱請公私
出納並以錢會各半天下稱便被命接伴金使之

賀生辰者金曆九月晦與統天曆不合密要說金使合從慶曆節正日隨班上壽金使屈服孝宗悅以忤樞密王抃落職光宗卽位擢煥章閣直學士四州安撫陞辭奏曰臣入蜀後吳挺脫至死亡兵權不可復付其子臣請便宜撫定諸軍以俟朝命挺歿密奏請他將命張詔代挺李仁廣副之遂革吳氏世將之患其後韓侂冑復以兵權付挺子曦曦果叛識者始服密之先見寧宗朝自慶元府入朝韓侂冑知密平日主復讐與可與共功名示以

北伐議密曰中原淪陷我不可一日忘然兵凶器
危勝負未可知首事之禍其誰與任議得寢改知
建康府佐冑聞金置平章宣撫河南奏以冑宣撫
江淮以應之密言金人未必有意敗盟中國但當
申警軍實釁自彼作則我有辭矣佐冑又議除密
內職宣諭兩淮密曰使名雖異其示敵人嫌疑之
迹則同不宜輕舉佐冑滋不悅乃除密寶文閣學
士江淮宣撫使時宋師克泗州而潰於宿壽密欲
全淮東兵力爲兩淮聲援奏泗州孤立淮北所屯

精兵幾二萬人萬一金人南出清河口及犯天長
諸城則首尾中斷莫若棄之還軍盱眙從之金人
自渦口犯淮南或勸宥棄廬和爲守江計宥曰棄
淮則與敵共長江之險矣吾當與淮俱存亡益增
兵爲防時金人有和意宥以用兵出侂冑謀請移
書與敵宜暫免係銜侂冑怒罷宥及侂冑誅起知
建康府淮南運使招輯邊民爲御前武定軍分爲
六軍餘汰歸農月省錢米幾十萬以病丐歸卒謚
忠定宥儀狀魁傑神機英悟常慷慨語人曰生無

以報國歟願爲猛將以滅敵其忠義之性然也

丘定夫字景游密四世孫與兄楊州教授景唐弟淞陽縣丞景南三人同居一門之內怡怡如也二子堅基皆爲儒官克世其家云

張訢毘陵人紹熙間知紹武光澤縣嘗倣社倉之法境內以寧諸市里之民貧無蓋藏及中下之家生子不舉者皆人爲之給又附倉列屋以待行旅凡疾病無所歸者悉就養焉其法甚精朱熹爲之記丁常任字卿秀寶臣從孫博學強記累官戶部侍郎

極論復讐大義言極憤切孝宗爲之動容官實謨
閣侍制致仕爵晉陵縣男食邑三百戶壽八十三
終于家

薛極字會之武進人日記萬言後舉進士嘉定間朝
廷議更楮幣朔安邊司極與有力嘗上疏寧宗曰
願陛下深思顧諟之難益懷兢業之念勿謂帝德
罔愆而怠於進修勿以天災代有而應以不實紀
綱雖舉必益求其所未至德澤雖布必思及其所
未周上嘉納之立朝三十餘年多所裨益終祭知

政事封和國公致仕卒

蔣重珍字良貴無錫人從尤文簡學嘉定末進士第
一授建康府簽判與太守議荒政不合引疾乞祠
卽所居築一梅堂羣書自娛與魏鶴山真西山爲
深交紹定初召對首以本心外物界限爲言且論
苟直無窮之費民有無窮之憂會行都火史彌遠
當國乃極言主柄下移權臣勢重天下知有相而
不知有君上讀之感動他日星變復申前說進爲
君難六箴皆極剴切召爲秘書郎端平初入對上

五事乞召用員德秀魏了翁進崇政殿說書進講
戒勿白家事務以積誠寤主每草奏磨心盛服有
密啟則手書削稿遷著作郎邊師議和戰不一重
珍奏乞專意備守不得已則用應兵不聽及關洛
師大衄復議進兵重珍言耻敗而欲勝之則成忿
怒生靈之命豈可以忿怒用哉又言邇來用臺諫
頗主不必矯激之說似畏其剛方太過豈欲其平
易省事乎又言更化以來舊敝未去者五徇私調
停覆護姑息依違而又蒞之以輕易遷起居郎三

辭不許自効其不能取信朝廷之罪久之詔守刑部侍郎致仕卒謚忠文學者稱爲一梅先生

向士璧字君玉武進人紹定間進士累官大理卿合州告急捐家百萬以供軍費帝嘉獎之開慶初涪州危士璧往援時賈似道宣撫六路檄士璧以軍事付呂文德士璧不從以計斷浮橋奏捷元兵圍潭州甚急士璧破之進兵部侍郎似道嫉其功諷御史劾罷之又責償守城時所用金穀逮至行部士璧不能償而死復拘繫其妻子徵之德祐初詔

復其官立廟潭州

錢相字君玉晉陵人幼穎異以詞賦稱登嘉定間進士端平間以直德秀薦累遷監察御史有直聲自起居郎入經筵歷兵禮吏部尚書以親老丐祠年八十一而卒以德壽稱

趙發字達甫江陰人嘉定末進士端平初上欲除發諫省會當國者先遣所親諭意發謝絕之命遂寢終秘書省校書郎發和而肅介而通粹然君子之儒

胡鎡字伯遠江陰人嘉定末進士歷知寶慶府工部
郎官學有根本一室蕭然疑塵滿几處之晏如嘗
有詩云貧居三不往薄宦兩無求三不往者州郡
時貴富室也兩無求者薦剋財貨也由冊府典名
藩同館以詩送之曰院靜書千卷庭清水一盂蓋
實錄云

李晦字顯翁無錫人育於外祖左梅澗家從其猶子
棟學凡有觀覽卽通其旨咸淳中領鄉薦肆意經
史下至稗官小說無不涉獵有事文類聚校正白

虎通風俗通等集自號慧泉散吏子元昭慈湖書院山長元明亦隸儒選

包天麟字仁甫江陰人咸淳間舉傳學宏詞科嘗注易詩書春秋年八十三而卒手未嘗釋卷元旌表其門贈江浙儒學提舉子植標俱登第

曹岳江陰人第進士仕至朝奉郎江陰縣尉爲縣屬毘陵民間舊無產稅出丁鹽錢所輸特重岳爲請僅存什二人皆德之

姚訔宜興人元兵圍常州州守趙興鑑遁州人王良

臣等以城降言與陳炤謀起民兵復之事聞授
知常州伯顏圍城嘗與炤王安節等力戰固守招
降百端終不聽顏怒役民運土爲壘并日築之且
殺人煎油作砲日夜夾攻城中甚急而嘗守志益
堅力屈城陷與炤安節皆歿之

陳炤字光伯無錫人登咸淳初進士素號知兵及元
兵攻常州姚崑爲郡守時炤以胸山令守毋喪嘗
辟爲通判或止之炤曰鄉邦淪沒何可坐視遂墨
衰率義兵戰禦旣而伯顏自將攻圍城陷嘗歿之

紹猶巷戰家人請曰城東北門圍未合可走常熟
入臨安紹曰去此一步非死所矣日中兵至死焉
詔贈朝奉大夫有司立廟祀之紹率兵時其子應
龜出家貲犒軍乞援兵于文天祥宋亡應龜杜門
不出衣冠無改以終其身

胡應炎字煥卿宿八世孫咸淳初進士元兵至常郡
守姚嘗見應炎喜曰君吾劇孟也署爲節度判官
應炎歸告父兄曰吾家世受國恩今戎馬在郊實
立功圖報之秋吾不得復向家矣父與其兄應發

咸曰圖報之義父子兄弟同之豈容臨難苟免乎
乃命其弟應登奉母及其妻子出遯以存其宗應
炎選壯士三千人自將乘城爲訾晝曰吾州京師
北門然城卑塹狹兵皆市人北兵乘勝銳且衆不
可當宜樹柵傳城益調粟繕械爲守備計訾然之
伯顏命元帥唆都率兵二十萬圍城應炎與諸將
分門出戰各大捷殺其將校甚衆唆都請益師攻
圍益急餉援俱絕城陷訾歿之應炎巷戰力屈就
擒唆都曰若卽多殺吾將校者邪應炎曰吾欲殺

汝何將校邪恨力不及爾陵都怒遂遇害年才二十七同縣包圭者素有謀畧亦爲嘗用署武進縣被執不屈

徐道明常州天慶觀道士元兵圍城請于郡守姚嘗曰計將安出嘗曰死守而已道明還告其徒曰姚公誓與城俱亡吾屬亦不失爲義士乃取觀之文籍置石函藏坎中兵屠城道明危坐讀老子以刃脅之不動遂遇害

吳謙之宜興人爲郡城寺僧糾合義士捍禦鄉閭詔

爲溧陽尉率兵巷戰沒于陳贈武功大夫同時有

萬安僧亦起兵舉義旗曰降魔其詩曰時危聊作

將事定復爲僧亦戰歿

武進護國寺後石塔相傳僧葬其下

蔣捷字勝欲陽羨人徙武進德祐進士平生喜著述
主於理義不爲勦說其於小學詳斷發明旨趣尤
奧元初遁跡不仕大德間憲臣交章薦捷不就
臣二姓蓋天植其操云家竹山學者稱爲竹山先
生

曹鉅字巨山江陰人第進士分教京口李寶辟置幕

府寶檄告山東文出岷手氣直辭壯激厲士心人
百其勇凱旋特授左宣教郎終通判饒州

錢紳字紳仲無錫人登進士任知州既仕而歸隱居
漆塘山中志尚高潔工詩嘗著詩話若干卷所居
有湖山之勝得泉于居之南味與惠泉無異名曰
通惠作亭其上

董蕃字子衍宜興人冲約靜修恬於進取元初舉茂
異除釣臺書院山長不就所著有通鑑質疑巴西
鄧文原爲之序

繆鑑字君寶江陰人孝友勤儉好學樂施宋政日紊
不復仕進以詩酒自娛學士大夫至今誦之

魏陵人品記卷四